

**Maannakkut suliffimmut atatillugu inigisap ukiut arfineq-marluk najugarereerlugu tigusinnaanera allangortillugu suliffimminut atatillugu ineqartup inimini ukiuni pingasuni najugaqareersimasup, inigisani nalinginnaasumik attartortittakkatut tigusisinnaangornissaanut UKA 2012-mi ininik attartorneq pillugu Inatsisartut Peqqussutaata nr. 2-p 12. Maj 2005-imeersup allangortinneqarnissaa pillugu siunnersuummik allannguutissamik saqqummiussinissamut Naalakkersuisut peqquneqarnissaannik Inatsisartut aalajangiiffigisassaattut siunnersuut**  
(Inatsisartunut ilaasortaq Andreas Uldum, Demokraatit)

### **Akissuteqaat**

(Ineqarnermut, Attaveqarnermut Angallanermullu Naalakkersuisoq)

aalajangiiffigisassatut siunnersuummut aammalu ineqarnermut suliassaqarfimmut tunngatillugu, sulisunut inissianut apeqqut ilanngullugu, oqaaseqaatinut saqqummiunneqartunut Naalakkersuisut qujapput.

2013-imi attartortitsisarnermut peqqussut nutaarluinnaq, inissianik attartortitsisarneq pillugu Inatsisartut peqqussutaat nr. 2, 12. maj 2005-imeersumut (attartortitsisarnermut peqqussut) taartaasusaaq, suliarineqarsinnaasasooq naatsorsuutigineqarpoq. Attartortitsisarnermut peqqussuttip maannakkut atuuttup arlalitsigut nutarterneqarnissaa pisariaqarpoq, tamatumunngalu atatillugu sulisunut ineqartitsisarnerup attartornermut peqqussummiit peerneqarnissaa pilersaarutigineqarpoq, sulisunut inissiat atorfeqarnermut tunngasuummata, taamaattumillu attartornermut peqqussummi maleruagassiuunneqartariaqarani. Taamaattumik sulisunut innersuussisarnermut maleruagassat, maannakkut attartortitsisarnermut peqqummut ilaatinneqartut immikkut maleruagassiuunneqarnissaat naatsorsuutigineqarpoq.

Ukiuni arfineq malunni najugaqareersimanissamut maleruagassamut taarsiullugu ukiuni pingasuni najugaqareersimanissamut maleruagassaqalernissamik siunnersuut tapersorsorneqarsinnaangilaq, taamaaliortoqassappat attartortunut nalinginnaasunut ajoqutaasumik assigiinngisitsisoqalissammat, pissutigalugu kommunini imaluunniit Namminersorlutik Oqartussani sulisut sulisunut inissiaq najugartik attartukkatut nalinginnaasutut tigusinnaalissagunikkut utaqqisut allattorsimaffiini allatsissimasut saneqqutiinnarsinnaalissammasigit. Siunnersuutip kingunerisaanik inuit ukiut pingasut ingerlaneranni utaqqisut allattorsimaffianniittorpasuit, Nuummi ukiuni 20-ine sivilisunerusumiluunniit utaqqisinnaasartut, saneqqutiinnarsinnaajumallugit Namminersorlutik Oqartussani imaluunniit kommunini atorfininnissaminnik isumaliuteqartalersinnaassapput.

Tamanna pissutigalugu Naalakkersuisut siunnersuut maannatut iluseqartillugu isumaqatiginngilaat, siunnersuummili siunissami inissianik niueruteqarnerup kiffaanngissuseqarfiulernissaa anguniarlugu sulisunut inissianik atorunnaarsitsiviusussami siunertaasooq tapersorsorlugu. Ineqarnermut inatsisit iluarsanneqarnissaat aammalu sulisunut inissiat ineqarnermik iluarsasseqqinnissamut ilanngunneqarnissaat Naalakkersuisut inassutigaaq. Tamanna isumaginninnermut akileraartarnermullu inatsisinik allangortiterinissamut atatillugu, kiisalu pisortat suliassaqarfiinik nutarterinerneqartut ilutigatillugu pissaaq, tamannalu aamma Akileraartarnermut Atugarissaarnermullu Ataatsimiititaliarsuarmit inassutigineqarpoq.

Taamatut oqaaseqarlutik Naalakkersuisut siunnersuutip itigartinneqarnissaa inassutigaat.